

საბჭოთა კავშირის ჩემპიონატი ფეხბურთში

უმაღლესი ლიგა

განვლილ შაბათ-კვირას გაიმართა სსრ კავშირის საფეხურთო ჩემპიონატის მატჩები უმაღლესი ლიგის გუნდებს შორის.

თბილისი ვ. ი. ლენინის სახელობის "დინამოს" სტადიონი, 26 აგვისტო

"დინამო" გაბელია, კეტაშვილი, ცხადაძე, ჭედია, ჩიქოვანი, დარასელია (თედევი 46), ჯიშკარიანი, ცვეიბა, ქეცბაია (სვანაძე, 71). კაჭარავა, გოგიჩაიშვილი.

"პამირი" მანანაკოვი, ფუზაილოვი, სტარტაკოვი, ვიტუტენევი, რასიმოვი, ლაგუტენკო, რაფიკოვი, (მანასიანი, 71), ბატუნკო, აზიმოვი, ზაბიროვი, მუჰამედოვი.

მსაჯი ა. სპირინი (მოსკოვი).

გააფრთხილეს: მანანიკოვი, კაჭარავა.

თვით ის ფაქტი, რომ უმაღლესი ლიგის დებიუტანტმა "პამირმა" ჩემპიონატის ორ შეხვედრაში 3 ქულა "აართვა" თბილისის "დინამოს", თავისთავად ბევრ რამეზე მეტყველებს. და თუ დუშანბეში შემდგარი მატჩის შემდეგ დინამოელებს გარკვეული პრეტენზიები ჰქონდათ მსაჯის მიმართ, ამჯერად საკმაოდ კვალიფიციურად ჩაატარა მატჩი. გათამაშების ცხრილში შექმნილი მდგომარეობის შესატყვისად "დინამოს" ეს თამაში აუცილებლად უნდა მოეგო და რევანში აელო პირველ წრეში განცდილი დამარცხებისთვის, მაგრამ, სამწუხაროდ, ეს ასე არ მოხდა. მეტის თქმაც შეიძლება: პირველი სახიფათო მომენტი თამაშის პირველივე წუთზე შეიქმნა თბილისელთა კართან და სტუმართა ერთ-ერთ თავდამსხმელს ხელზე რომ არ მოხვედროდა ბურთი, ვინ იცის როგორც წარმართებოდა მატჩის შემდგომი მსვლელობა.

ალბათ, არ შევცდებით, თუ ვიტყვით, რომ განვლილ მატჩში თითებზე ჩამოსათვლელად იყო დასამახსოვრებელი მომენტები. ძირითადად ეს იყო საკმაოდ უფერული, უინტერესო თამაში, რომელმაც ვერავითარი სიამოვნება ვერ მოუტანა სტადიონზე მოსულ ისედაც მცირერიცხოვან მაყურებელს.

თამაშის მე-6 წუთზე გოგიჩაიშვილის სწრაფ გარღვევას ბურთის კარის გასწვრივ ჩაწოდება მოჰყვა და კაჭარავამ კარგად გამოიყენა ეს შესაძლებლობა – 1:0. შექმნა შთაბეჭდილება, რომ "დინამო" იოლად შეძლებდა გამარჯვებას, მით უმეტეს, რომ სამიოდე წუთის შემდეგ იმავე კაჭარავამ თავით ძელს მოახვედრა ბურთი. არც პირველ ტაიმში და არც მთელ მატჩში საყურადღებო მეტი არაფერი მომხდარა, რა თქმა უნდა, თუ არ ჩავთვლით იმას, რომ თამაშის მიწურულს 85-ე წუთზე, როდესაც უკვე ყველა დარწმუნებული იყო "დინამოს" გამარჯვებაში, ჩიქოვანის შეცდომა კარგად გამოიყენა ზაბიროვმა, იგი პირისპირ გავიდა გაბელიასთან, თბილისელთა მეკარემ პირველი დარტყმა მოიგერია, მაგრამ ზაბიროვმა მოახერხა ხელმეორედ დაერტყა და ანგარიშიც გათანაბრდა – 1:1.

თბილისის "დინამოს" ეს მატჩი, ჩვენი აზრით, მთელი კოლექტივისთვის საგანგებო მსჯელობის საგნად უნდა იქცეს. როდის თუ არა ახლა, როცა ჩემპიონატი დასასრულს უახლოვდება, როცა თბილისის "დინამო" ბოლო წლების ტრადიციის შესაბამისად კვლავ და კვლავ უმაღლესი ლიგის დატოვების ერთ-ერთი უმთავრესი კანდიდატია, როცა პირველ წრეში "პამირთან" მის მინდორზე განცდილი მარცხის შემდეგ საჭირო იყო ძალების მაქსიმალური დამაზვით თამაში, საჭირო იყო თავგამოდებული, შეუპოვარი ბრძოლა ქულათა ერთობ მწირი მარაგის შესავსებად, დინამოელებმა აშკარად უპასუხისმგებლოდ, უმწეოდ და უთავბოლოდ ითამაშეს, ვერც ერთმა ფეხბურთელმა ვერაფრით ვერ გამოიჩინა თავი, მთელი გუნდი უხალისოდ არაკვალიფიციურად მოქმედებდა, მან მეტოქეს ვერ აჩვენა თავისი საბრძოლო განწყობა და ქულა ჩააბარა მას, ეს კი ის ქულაა, რომელიც, შესაძლოა ჩემპიონატის ფინიშზე ოქროს ფასად დაგვიჯდეს.

ასე თამაში არ შეიძლება, მით უმეტეს საკუთარ მინდორზე, საკუთარი გულშემატკივრის წინაშე! თბილისის "დინამოს" ფეხბურთელთა გულგრილი განწყობა და ინერტულობა საყოველთაო გულისწყრომას იწვევს და თუ მდგომარეობა უახლოეს ხანაში არ შეიცვალა, თუ ჩვენმა ფეხბურთელებმა მთელი შესაძლებლობით არ იბრძოლეს შექმნილი სავალალო მდგომარეობის გამოსასწორებლად, შესაძლოა გუნდი საგაისოდ დაბალი კატეგორიის ლიგაში ვიხილოთ. ეს კი ყოველად დაუშვებელი ამბავია თბილისის "დინამოსათვის!"

ნათქვამს ისიც უნდა დავუმატოთ, რომ სწორედ ახლა, როცა საკავშირო ჩემპიონატი დასასრულს უახლოვდება, სრული ძალით ათამაშდნენ ის გუნდები, რომლებიც თბილისის "დინამოს" მსგავსად უმაღლესი ლიგის დატოვების კანდიდატები არიან: განვლილ ტურში მოსკოვის "ლოკომოტივმა"

დონეცკის "შახტიორმა" და ერევნის "არარატმა" გამარჯვებები მოიპოვეს, ხოლო ლენინგრადის "ზენიტმა" და დუშანბეს "პამირმა" თითო ქულა აიღეს.

* * *

აღნიშნული ტური შეხვედრა ერევნის "არარატსა" და ოდესის "ჩერნომორეცს" შორის დამთავრდა ერევნელ ფეხბურთელთა გამარჯვებით ანგარიშით 3:1.

"ლელო" 23 აგვისტო 1989 წ.